

taaê no te mau taviri autahu'araa tei faaho'ihia mai, o te iriti i te mana e te puai o te mau oro'a faaoraraa. Mea papû roa to'u iteraa e, ua faaho'ihia mai taua mau taviri ra e te vai faahou nei taua mau oro'a ra i roto i te Ekalesia a Iesu Mesia i te Feia Mo'a i te mau Mahana Hopea nei, mai ta'u e ti'a papû atu nei i mua ia outou i teie vahi e te parahi ra outou i mua ia'u i roto i teie nei amuiraa.

Ia vai puai outou. A ora itoito i te evanelia noa'tu aita roa vetahi na piha'ihio ia outou e ora ra. A paruru i to outou mau ti'aturiraa ma te maitai e te aroha, a paruru râ i te reira. E arata'ihia outou i te e'a no te ti'araa pîpî Kerestetiano e te hoê tabula roa no te mau reo faaurûhia, e tae noa'tu i te feia ta outou e faaroo mai i roto i teie amuiraa e te reo o ta outou i faaroo iho nei, no te peresideni Thomas S. Monson. E e'a afaro e e e'a piriha'o, e ere i te mea aano roa i te tahi mau vahi, e nehenehe râ e haerehia ma te oaoa e te manui'araa, « ma te tiai maiteraa i te Mesia... ma te tiai papu roa, e te here i te Atua e te taata atoa ».¹⁹ Na roto i te tamau-itoito-noa-raa i taua e'a ra, e faatupu outou i te faaroo aueue ore, e ite outou i te parururaa i te mau mata'i ino e pupuhi mai, e tae noa'tu i te mau te'a i roto i te mata'i u'ana, e farii ia outou i te puai pãpã o to tatou Faaora, ei ni'a iho outou e patu ai i to outou ti'araa pîpî itoito, e ore ia outou e ma'iri i raro.²⁰ I te i'oa mo'a o Iesu Mesia, amene. ■

TE MAU NOTA

1. Iakoba 1:8.
2. 1 Nephi 19:9.
3. 1 Korinetia 12:31; Etera 12:11.
4. Hebera 11:32–38.
5. Mataio 23:37–38.
6. Exodo 3:8.
7. Hi'o Exodo 20:3–17.
8. 2 Paraleipomeno 18:7.
9. Mosia 13:4.
10. Isaia 30:9–11.
11. Hi'o Henry Fairlie, *The Seven Deadly Sins Today* (1978), 15–16.
12. Hi'o Mataio 5:29–30.
13. Mataio 10:34.
14. Mareko 5:17.
15. Hi'o Mataio 9:34.
16. Ioane 15:12.
17. Ioane 14:15.
18. Mataio 5:19; apitihia'tu te haapapuraa.
19. 2 Nephi 31:20.
20. Hi'o Helamana 5:12.



Na Ronald A. Rasband

No te peresideniraa o te Hitu Ahuru

Te hopoi'a oaoa no te ti'araa pîpî

E faufaa taa ê te patururaa i to tatou feia faatere ; ua apitihia te reira te hopoi'a ia amo atoa mai i ta ratou hopoi'a e ia riro ei pîpî na te Fatu Iesu Mesia.

I te 20 no me i te matahiti i ma'iri a'enei, ua vavahi te hoê mata'i roro-fa'i i te pirioire no Oklahoma City, i ropu i te fenua Marite, e ua paohia teie vahi i te hoê aanoraa hau atu i te 1,6 km e te hoê roaraa 27 km. E mau puahiohio ri'ari'a mau, e ua faataui roa teie vero i te hoho'a o te fenua e te oraraa o te taata i roto i to'na tere.

Hoê noa hepetoma i muri mai i teie vero rahi, ua tonohia vau ia tere atu i ô, ua apapa haere noa te mau hu'a-hu'a fare e te mau tauihaa i ni'a i teie mahora ano.

Hou vau a tere ai i ô, ua paraparau vau i to tatou peropheta here, o te peresideni Thomas S. Monson, o te au roa a'e i te ohipa a te Fatu. Ma te faatura rahi ia'na no to'na ti'araa e to'na atoa maitai, ua ui au, « Eaha ta oe e hinaaro ia rave au ? Eaha ta oe e hinaaro ia parau atu vau ? »

Tape'a marû mai ra oia i to'u rima, mai ta'na e na reira i te feia ati atoa e te feia tauturu atoa o te vero, a hani tei reira oia, e ua parau maira :

« A tahi, a parau atu ia ratou e, ua here au ia ratou.

« A piti, a parau atu ia ratou e, te pure nei au no ratou.

« A toru, a haamauruuru atu na i te feia atoa e tauturu ra ».

Ei tino no te peresideniraa o te Hitu Ahuru, e nehenehe ta'u e ite i ni'a i to'u taponi i te teimaha o te mau parau a te Fatu ia Mose :

« A haaputu mai na oe i te taata ia hitu ahuru no te feia paari i Iseraela nei, ta oe i ite ra, ei tavana, e ei taata toro'a no te mau taata nei ... »

« E na'u e pou i raro e parau ia oe ra i reira ; e rave ho'i au i ta te varua i ni'a iho ia oe ra, a tuu ai i ni'a ia ratou ; e ei ni'a'toa ia ratou taua hopoi'a ra o te mau taata nei, eiaha ei ni'a ia oe ana'e ra ».¹

E mau parau te reira i to tahito ra, aita râ te mau haerea o te Fatu i tau.

I teie mahana i roto i te Ekalesia, ua pii te Fatu e 317 Hitu Ahuru, e tavini nei i roto e 8 pûpû, no te tauturu i te Tino Ahuru Ma Piti Aposetolo ia amo i te hopoi'a tei tuuhia i ni'a i te Peresideniraa Matamua. E hopoi'a te reira ta'u e farii oaoa nei mai te hohonu o to'u varua, na reira atoa no to'u mau Taea'e. Atira noa'tu, e ere o matou ana'e teie e tauturu nei i roto i teie ohipa hanahana. Ei melo no te Ekalesia na te ao taatoa nei, e rave'a



faahiahia ta tatou paatoa no te haamaitai i te oraraa o vetahi ê.

Ua haapii mai au mai roto mai i to tatou peropheta here e, te mea e titauhia e te taata tei ta'irihia e te vero—o te here, te mau pure e te haamaururuurua no te rima tauturu.

I teie avatea, ua afa'i tuea tatou paatoa i te rima atoa no te paturu i te Peresideniraa Matamua e te Pūpū no te Tino Ahuru Ma Piti Aposetolo ei mau peropheta, ei mau ite e ei mau hehehu parau no Te Ekalesia a Iesu Mesia i te Feia Mo'a i te Mau Mahana Hopea Nei. E ere te reira i te hoê noa ohipa mana, e ere atoa no te feia ana'e tei piihia i te taviniraa teitei. E faufaa taa ê te patururaa i te feia faatere ; ua apitihia te reira i te hopoi'a ia amo atoa mai i ta ratou hopoi'a e ia riro ei pīpī na te Fatu o Iesu Mesia.

Ua parau te peresideni Monson e :

« Te haatihia nei tatou e te feia e hinaaro nei ia haapa'o tatou ia ratou, ia faaitoito, ia paturu, ia tamahanahana e ia faaite i te maitai—e melo anei no te utuafare iho, e hoa anei, e mau taata matauhia anei e aore rā, e taata ê. Tatou te rima o te Fatu i ni'a i te fenua nei, ma te faauerua ia tavini e ia faateitei i Ta'na mau tamarii. Te ti'aturi nei oia ia tatou tata'itahi...

« ... O outou i na reira i te hoê taea'e iti ha'iha'i roa i roto i tau mau taea'e nei, ua na reira mai ia outou ia'u nei' [Mataio 25:40] ».²

E pahono anei tatou ma te here ia tae mai te tauraa ia tatou ia haere e farerei, ia taniuniu, ia papa'i i te hoê poro'i e aore rā ia rave hoê mahana no te tauturu i te tahi taata ? E aore rā, e pahono tatou mai te taata apī ra tei haapapū e, te pee nei oia i te mau faauerua atoa a te Atua.

« Ua hope te reira i te haapa'ohia e au, mai to'u apīraa mai â ; e eaha iho â tei toe ia'u ? »

« Ua parau atura Iesu, Ia hinaaro oe e ia maitai roa, a tii a hoo i ta oe atoa ra, a hopoi atu ai na te taata rii, e e tao'a ta oe i te ao i reira a haere mai ai a pee mai ia'u ».³

Ua piihia te taata apī no te hoê taviniraa rahi a'e i piha'iho i te Fatu no te rave i te ohipa no te basileia o te Atua i ni'a i te fenua nei, ua huritua mai ra oia, « e tao'a rahi ho'i ta'na ».⁴

Eiaha ia ta tatou mau tao'a i ni'a i te fenua nei ? Ua ite tatou e, na te puahiohio e rave i te reira, e tau minuti noa. E mea faufaa roa ho'i no tatou tata'itahi ia tutava no te haaputu i ta ratou tao'a pae varua i ni'a i te ra'i—ma te faa'ohipa i to tatou taime, ta tatou

mau tarenī e to tatou ti'amāraa no te tavini i te Atua.

Te tamau noa nei Iesu Mesia i te faatae mai i te piiraa « A haere mai... a pee mai ia'u ».⁵ Ua haere Oia e te feia tei pee Ia'na i To'na fenua ai'a ma te mana'o i te tahi. Te tamau nei Oia i te haere e tatou, ma te ti'a i piha'iho ia tatou e ma te arata'i ia tatou. Te peeraa i To'na hi'oraa maitai roa o te iteraa e te faaturaraa i te Faaora, tei amo i ta tatou atoa mau hopoi'a na roto i Ta'na Taraehara mo'a e te faaora, oia ho'i, te taviniraa hope roa ino. Ta'na noa e ani ia tatou paatoa, ia ti'a e ia hinaaro ia amo ma te oaoa i te « hopoi'a » no te ti'araa pīpī.

I ô i Oklahoma, ua fana'o vau ia farerei i te tahi o te mau utuafare tei ta'irihia e na puahiohio rahi. Ua paraparau vau i te utuafare Sorrels, e ua putapu vau i te ohipa i tupu i ni'a i ta ratou tamahine, o Tori, e tamarii i roto i te piha CM2 no te haapiiraa no Plaza Towers Elementary. Tei ô nei oia e to'na metua vahine i teie mahana.

Ua haaputupu Tori e te tahi o to'na mau hoa i roto i te fare haumiti, tei reira to ratou haapuraa a ta'iri ai te puahiohio i te fare haapiiraa. A faaroo mai a tai'o ai au i te mau parau a Tori no te ohipa tei tupu :

« Ua faaroo vau i te hoê paaina i ni'a i te tapo'i fare. Ua mana'o vau e, e ûa paari noa tera. Puai mai nei te maniania e puai faahou atu. Ua pure au ia paruru mai te Metua i te Ao ra ia matou e ia maitai noa matou. I tera ra taima, ua faaroo vau mai te maniania rahi o te matini ote pehu, ei reira, ua mo'e te tapo'i fare i ni'a mai i to matou upoo. E mea puai te mata'i e ua pee haere noa te mau ohipa paparari e ua tote atoa i ni'a i to'u tino. E mea poiri roa i rapae e mai te huru ra e, ua ereere roa te ra'i, e ere ra—o te roto o te puahiohio. Ua tapiri noa vau i to'u mata ma te ti'aturi e ma te pure e, e faaea oioi te reira.

« Ei reira, mu ta'ue noa'tu ra.

« I te tamataraa vau i te hi'o atu, tei mua noa i to'u mata te hoê tapa'o puromu « stop » ! Fatata roa i te tote i to'u ihu ».⁶

Na roto i te hoê semeio, ua ora mai o Tori, to'na metua vahine e toru o to'na taea'e e e rave rahi atoa hoa to'na, ratou tei faaea i te fare haapiiraa i te taima o te puahiohio ; aita râ e hitu o to ratou hoa haapiiraa i ora mai.

I tera hopea hopetoma, ua horo'a noa te mau taea'e o te autahu'araa i te mau haamaitairaa i te mau melo tei mauui i te vero. E mana'o faahaehaa tei tae mai ia'u no te horo'a i te hoê haamaitairaa no Tori. A tuu ai au i to'u na rima i ni'a i to'na upoo, ua tae mai te hoê irava au-roa-hi e au : « E vai ho'i au i to outou pae atou e i to outou pae aui, e ei roto ho'i to'u Varua i to outou mau aau, e ta'u mau melahi ho'i e ati noa'e ia outou na, ia haamaraa mai ia outou i ni'a ».⁷

Ua a'o atu vau ia Tori ia haamana'o i te mahana ua tuu te hoê tavini a te Fatu i to'na pu'e rima i ni'a i to'na upoo e ua faahiti e, ua paruruhia oia e te mau melahi i roto i te vero.

Ua riro te tororaa i te rima tauturu no te faaora i te tahi taata, noa'tu te huru raveraa, ei hoê faito mure ore no te here. E taviniraa te reira o ta'u i ite i Oklahoma i te reira hepetoma.

Pinepine tatou i te horo'ahia i te rave'a no te tauturu i te tahi taata i roto i to ratou ati. Ei melo no te Ekalesia, e hopoi'a mo'a na tatou ia « tauturu te tahi i te tahi i te hopoi i ta outou mau hopoi'a, ia māmā te reira »,⁸ « ia au ia

outou ia oto, a oto ai te feia oto ra »,⁹ ia « faateitei mai i te rima tautau ra i ni'a, e a faaetaeta i te mau turi avae paruparu ra ».¹⁰

Te mau taea'e e te mau tuahine, auê te maururu rahi o te Fatu ia outou tata'itahi e i te taatoaraa, no te mau hora e te mau ohipa rahi roa ino ta outou e horo'a nei i roto i te taviniraa, te mea rahi anei e te mea na'ina'i, ma te rima here e te aau aroha, i te mau mahana tata'itahi.

Ua haapii te arii Beniamina i roto i te Buka a Moromona, « a tavini ai outou i te taata nei, te tavini ia outou i to outou Atua ra ».¹¹

Na roto i te taviniraa i to tatou mau taea'e e mau tuahine, e nehenehe te reira e arata'i ia tatou ia rave i te mau faaotiraa hanahana i roto i to tatou oraraa i te mau mahana atoa, ia faa-ineine ia tatou ia haafaufaa e ia here i te mea ta te Fatu e here nei. E ia rave tatou i te reira, te faa'ite ra tatou na roto i to tatou oraraa e, ua riro tatou ei mau pipi Na'na. Ia tomo ana'e tatou i roto i Ta'na ohipa, e ite tatou tei ia tatou ra To'na Varua. E tupu rahi atu

â to tatou iteraa papû, to tatou faaroo, to tatou ti'aturiraa e to tatou here.

Ua ite au te ora nei to'u Taraehara, oia ho'i Iesu Mesia, e te paraparau nei Oia i Ta'na peropheta e na roto ia'na, oia ho'i to tatou peresideni here Thomas S. Monson, i teie nei, i to tatou nei anotau.

Ia ite mai tatou paatoa i te oaoa e tae mai na roto i te taviniraa mo'a no te amora i te mau hopoi'a a te tahi e te tahi, te mea ohie mai te mea na'ina'i, o ta'u ia pure na roto i te i'oa o Iesu Mesia, amene. ■

TE MAU NOTA

1. Numera 11:16–17.
2. Thomas S. Monson, « Eaha ta'u i rave no te hoê taata i teie mahana ? » *Liahona*, Novema 2009, 86, 87.
3. Mataio 19:20–21.
4. Mataio 19:22.
5. Mataio 19:21.
6. Aamu no Victoria (Tori) Sorrels, faati'ahia i te 16 no tenuare 2014.
7. Te Parau Haapiiraa e te Mau Parau Fafau 84:88.
8. Mosia 18:8.
9. Mosia 18:9.
10. Te Parau Haapiiraa e te Mau Parau Fafau 81:5.
11. Mosia 2:17.

